

人云○以權任中為掌令李行遇為修撰○壬戌以沈諮為都承旨○癸亥雨  
雹異方赤氣燭天○右議政沈悅上劄曰大臣之無領度支 祖宗朝絕無之  
事也今始新創事未妥當苟有利於國家則前規有無不須太拘而今臣無帶  
有害無益蓋家無二尊官無二長令出多門債事之道也臣若隨事指揮則未  
免侵官該曹每事問臣則亦非專任責成之意也虛帶官銜事理不當請亟收  
無帶之命 上許之○甲子先是左議政申景禎於筵中啓曰世子今將出來  
大君獨留而不可無陪侍之人入送宰臣一人似當 上曰與他大臣議處後  
大臣久不回啓 上下教于政院曰頃因左相啓辭答以與他大臣議處而厥  
後專無黑白未曉其意也大君非他國之人領右相亦宜記念也仍 下教曰  
宰臣中可合人擇遣領相崔鳴吉右相沈悅詣賓廳待罪吏曹以李行健抄啓  
上命改望又以卞三近抄啓命副賓客辛啓榮調理入往○乙丑以金壽賢  
為大司憲趙壽益為執義林得悅為掌令柳琳為統制使○丙寅尹暉還自潘  
陽○丁卯流星出天津星下入鉤陳星下○幸成均館謁聖行酌獻禮試士于  
明倫堂取權誦等七人試武藝于下輦臺取金士吉等十一人即日放榜○戊  
辰漢舡三艘自獐子島至頭毛淵距我境二十餘里義州府尹恐清人覺之使